









7990







E. MARTIN REL



HARANGVE, 21

O V R E M O N -  
S T R A N C E F A I C T E A  
M O N S E I G N E U R L E D V C D E  
Mayenne, Apres le retour de son  
armee à Paris, au Conseil de l'V-  
nion, Au Preuost des Marchans  
& Escheuins.

P A R L E S I E V R D E  
*Varaine Gentil-homme Catholique,  
tres-affectionné en ceste sainte  
cause, pour le repos de la  
France.*



A PARIS,  
Par Pierre Mercier.

1589.

*Auec permission.*

13. juin

13  
ROMAN VO

ASTORIA ASTORIA

11 11 11 11 11 11 11 11 11 11

Case 11 11 11 11 11 11 11 11 11 11

11 11 11 11 11 11 11 11 11 11

11 11 11 11 11 11 11 11 11 11

11 11 11 11 11 11 11 11 11 11

11 11 11 11 11 11 11 11 11 11

11 11 11 11 11 11 11 11 11 11

11 11 11 11 11 11 11 11 11 11

11 11 11 11 11 11 11 11 11 11

11 11 11 11 11 11 11 11 11 11

11 11 11 11 11 11 11 11 11 11

11 11 11 11 11 11 11 11 11 11

11 11 11 11 11 11 11 11 11 11

11 11 11 11 11 11 11 11 11 11

11 11 11 11 11 11 11 11 11 11

11 11 11 11 11 11 11 11 11 11

11 11 11 11 11 11 11 11 11 11

11 11 11 11 11 11 11 11 11 11

THE NEWBERRY  
LIBRARY





# REMONSTRANCE FAITE

*A Monseigneur le Duc de Mayenne,  
& à Messieurs du Conseil de la Saint-  
Ete Vnion, & à Messieurs le Preuost des  
Marchans, & Escheuins de la ville  
de Paris.*

Par le Sieur de varaine Gentilhomme  
Catholique, & desireux du repos  
public.



Onseigneur, S'il vous eust pleu pourueoir à l'auertissement que ie vous dōnay, auāt que partir de ce lieu: vous eussiez empesché les courses & rauages de Giury, lesquelles ont apporté tant de nuisance, & d'incommodité à l'aduancement des affaires. Ie vous fis certain que de iour

à autre, il se renforçoit, qu'il prenoit des forts, ports, pons & passages en Brie, tant sur les bords des riuieres, que sur la terre: par lesquels les viures ont accoustumé venir à Paris, & pres Melun, lors que le chasteau fut rendu, le canon estant tout porté, l'on deuoit tout soudain aller reprendre lesdits passages (qui ne seroient encore repris sans vostre retour) qui sont de telle importance, qu'ils contraignent Paris d'auoir famine: avec laquelle il se peut prendre, & rendre, & non autrement sans intelligence, pour laquelle decouurir & empêcher, faudra auoir les yeux d'Argus, sans se laisser endormir par des Mercures. Il faudra dis-ie, cognoistre les bons & fideles Catholiques, d'avec les dissimulez, qui sont plus à craindre que les heretiques & Politiques. Il en faudra faire preuue si exacte, qu'elle soit aussi certaine & asseurée que l'or par la touche, & n'estoit ceste fiction & dissimulation de tant d'hommes bigarrez qui se messent parmy les bons, & zelez Catholiques pour decouurir, deceler, & empescher les sainctes entreprises, l'on viendroit bien tost à la Paix, & à la tranquillité, que tous les bons desirent de reuoir



reuoir en ce pauvre, & desolé Royaume. Je  
vous dōnay aduis q̃ Giury avec ses troup-  
pes, yroit ioindre celles du sieur de Lon-  
gueuille, la Nouë, & Humieres, pour aller  
secourir Toré, ja entré dans Senlis, par la  
perfidie & foy violée des Habitans, qui  
neantmoins volontairement vindrent à  
Paris, jurer la S. Vnion. Au partir de là l'en-  
nemy est venu tousiours battant les no-  
stres, qui fuyoient espouuëtez iusques aux  
portes de Paris, & malgré nous, ont enui-  
taillé le Chasteau de Vincennes, qui eut  
esté rendu long temps y-a, sans tant de per-  
tes qu'on a faictes deuant, d'hommes, &  
d'argent, qui est vne grande incommodité  
pour ceste ville Capitale, & maistresse du  
Royaume, d'auoir si pres vne place qui luy  
soit contraire, & qui court sur les Citoyës,  
les emprisonne, & rançonne s'ils s'esloi-  
gnent tant soit peu des portes de Paris, ou-  
tre, que c'est tousiours vne retraite seure,  
& ouuerte à l'ennemy qui voudra venir  
molester ceste grande Cité, comme l'on  
l'a veu & experimenté ces iours passez,  
non sans grande frayeur & estonnement  
du peuple. Si on l'eust battu de huit ou  
dix pièces de batterie, ce qui aduiendra,



qu'il se rendra s'il vous plaist commander le battre de la façon. Beaucoup d'autres que ceux de Senlis ont esté receuz à iurer l'Vnion, qui depuis ont faulcé leur sermēt. Ceux là faulseront qui preferent leurs affaires particulieres aux publiques, & qui veulent seulement conseruer leurs maisons. Comme a bien sceu faire la Marechalle de Montmorency, reuenue de Languedoc pour iurer l'Vnion, au nom de son mary, qui toutesfois a esté plus aduisé que les autres, qui se sont laissez prēdre & defaire à la pipee. La bonne Dame pour conseruer ses maisons par trop voisines de Paris, a fait entendre aux simples qu'on ne trouua point estrange si en ces terres, on faisoit quelque assemblée de Gētils-hommes, Seigneurs & autres, que telle assemblée ne se feroit que pour faire partage de ses terres avec Meru, Toré, & autres ses coheritiers. Lors Toré commence de prendre Senlis pour sa part: de laquelle prise est aduenue vne perte d'hommes, & de biens inestimables, & coustera infiniment auant que la pouuoir reprendre. Laquelle toutesfois pouuoit estre reprise auant que le secours de la Noüe fust venu, sans l'auarice

rice d'aucuns qui commandoient deuant  
le siege. Tholouse mieux cōseillée que Pa-  
ris, a d'ordinaire de mille à douze cens che-  
uaux, tous prest à marcher, quand il est be-  
soin aller faire vne faction & sortie contre  
l'heretique qui l'enuironne, & l'a fait reti-  
rer. Si Tholouse a ceste force q̄ est de beau-  
coup moindre que Paris, pourquoy Paris  
en doit il pas auoir d'auantage de cheuaux  
entretenus, iusques à deux mille, & six  
mille hōmes de pied, pour deffēdre & em-  
pescher qu'on ne volle les viures qu'on y  
apporte? les marchandises, & autres four-  
nitures, voire de prēdre des Habitans pri-  
sonniers iusques aux portes, comme fait  
ordinairement l'ennemy? tellement que si  
telle violence & resistance dure plus long-  
temps, les Habitans se verront reduits à  
tres-grāde necessité, cōme l'on void desia,  
veu que de pas-vn endroiēt de France, hō-  
me quel qu'il soit n'ose se mettre en che-  
min pour y venir, tant les passages sont oc-  
cupez, soit d'ennemis, soit de voleurs, qui  
se donnent toute permission de mal faire?  
O villes miserables qui apres auoir iuré  
l'Vnion, vous rendez infames & periures?  
vous laissez prendre, surprēdre, & repren-  
dre,



dre le tout à vostre ruine , & perdition en-  
 tiere des vostres, & de voz voisins qui vous  
 maudissent. O auarice detestable source  
 de tous maux , & de l'impieté & iniustice  
 qui regne en ce Royaume desolé, pour es-  
 tre diuisé en religion , & trahy par ceux  
 auxquels l'auarice commande & domi-  
 ne , l'auarice fait perdre les ames des  
 Empereurs, des Princes, des Magistrats , &  
 des Marchans. L'Empereur Maurice, sa  
 femme , & cinq enfans qu'il auoit , furent  
 tous decapitez par leur auarice, Philippe  
 Roy des Macedoniens , n'a captiué la li-  
 berté de la Grece , que par l'auarice des  
 Grecs, car il les vainquit par presens , &  
 non par armes, si bien qu'il disoit que ville  
 aucune ne luy estoit imprenable , pourueu  
 que par les portes d'icelle , il peust faire  
 passer vn mullet chargé d'or , monstrant  
 par là que l'auarice des Citoyens, est la seul-  
 le cause de leur ruine, & de la destruction  
 & saccagement de leurs villes. Le Conseil  
 estably pour la S. Vnion ne doit errer, ny se  
 laisser abuser ny tromper par des perfides,  
 comme le Conte Mauleurier, à qui aucuns  
 ont fait donner argent & armes, pour la  
 deffence de ce party. Beau defendeur qui  
 oncques



oncques ne fit exploit de guerre bon , ou  
 mauuais ? pour la personne , il est plus à  
 craindre mort , que vif. Ce-pendant il a  
 armé des soldats qui maintenant nous  
 font la guerre , à noz despens. Telles gens  
 tombans en noz mains ne meritent que la  
 corde, au lieu de misericorde, sans les laif-  
 ser aller souz leur foy canine, c'est elle qui  
 est la plus cōmune, & les autres que nous  
 prendrons prisonniers, s'ils sont des chefs,  
 ne les laisser plus aller, mais les tenir tous-  
 iours prisonniers , tant qu'ils seront en tel  
 estat, ils ne pourront faire la guerre , car le  
 prisonnier, & le mort ne fait plus la guer-  
 re , Chastillon de ceste Beaulse qu'on a  
 laissé aller , nous faict plus cruellement la  
 guerre , qu'auparauāt qu'il fust prisonnier.  
 Si Giury n'eust point esté deliuré & las-  
 ché, Il ne seroit maintenant periure, com-  
 me il est , & ne porteroit maintenant les  
 armes contre la S. Vnion: mais sur tous est  
 perfide, desloyal, & pariure le traistre de la  
 Nouë , lequel ayant esté retiré des prisons  
 & mains des Espagnols qui l'auoient des-  
 confi, & pris en Flandres: de sorte que tou-  
 tes les rançons pratiquées & leuées sur les  
 bourses des Huguenots de France & de



Flandres, ne le pouuoient rachapter de ces prisons, & de la mort qui luy estoit adiugée, neantmoins retiré de telle seruitude, par la faueur & priere du tres-haut & tres-illustre Prince, Monseigneur le Duc de Lorraine, avec serment de ne plus porter les armes contre les Catholiques, à faulx son serment, sa promesse, & sa foy, mais Dieu qui est le vangeur & punisseur des perjures, tesmoin l'Empereur Alexandre qui disoit, *Iurisiurandi violata religio, Deum ultorem habet*, c'est à dire, la religion du serment violee & enfrainte, a Dieu pour son vangeur, le punira quoy qu'il tarde. Punissez le soldat qui se desbandera de vostre armee, car s'il se desbande vne fois, il ne voudra plus retourner, ains vollera vn chacun. Les chemins proches des maisons fortes, seruent de retraicte aux volleurs. Le marchant n'y peut passer seurement: Le laboureur ne peut labourer, que ses cheuaux ne luy soient vollez: le laboureur cessant, la famine suruient: la mine de la France ne vient que du blé, que du vin, & autres marchandises, lesquelles n'ayans cours, il est impossible que puissions auoir argent pour faire la guerre. Cela nous touche

che de si près pour nous mouuoir à y donner ordre par nostre armee, d'abbatre & razer comme elle a commecé les autres maisons fortes, qui tiendront contre nous. Lors les volleurs qui vollent tous les Messagers venans en ceste ville, mesme ceux des pauvres Escholiers, avec lesquels plusieurs personnes viuent, seront plus aysez à prendre, & faire prédre: le laboureur plantera, semera, & recueillera sa moisson en la saison: le marchand yra & viendra libremér à son traffic & commerce. Les chemins seront ouuerts à ceux qui voudront venir à Paris demander Iustice, laquelle ils ne peuvent auoir sans leur presence, la Iustice cessant, tous crimes demeureront impunis, l'on ne peut ioüir de son bien, le seruice Diuin est delaisié en plusieurs lieux de la France, les hommes viuent comme bestes bruttes, & entrent en l'atheïsme, au mespris de l'honneur, & gloire de nostre Dieu, qui se fera bien recognoistre, par la victoire qui luy plaira nous donner contre les ennemis de son Eglise. Je prie donc son immense Majesté à ioinctes mains, qu'elle tourne sur nous ses yeux de pitié, & qu'elle nous donne sa grace, sa benediction, la



force pour vaincre & surmonter les ennemis de sa foy, & les aduersaires de l'ancienne religion, discipline, & splendeur de ce Royaume: Et aussi priant, Monseigneur, qu'elle vous assiste si fauorablement en voz entreprises, que vous surgissiez en bref au port heureux de voz desseins qui ( quoy que voz aduersaires en iugent & parlent autrement ) ne tendent qu'à la gloire de Dieu, au maintien de sa sainte & Catholique religion, & au soulagement de ce miserable Royaume.

*Fait à Paris ce 23. iour de Iuin. 1589.*

Vostre tres-humble & tres obeissant  
seruiteur le Sieur de Varaine.





## SONET.

A Monseigneur le Duc du  
Mayne.


Dv c sage, & genereux, qui suiuant le bon-heur  
De tes nobles Ayeuls, & leur haute prudence,  
Vas le iour, & la nuit travaillant pour la France,  
Pour la retirer hors d'encombre, & de douleur.

Voy, & lis ce discours qu'un humble seruiteur  
De Dieu, & du public, a mis en euidence,  
Pour faire aux bons François auoir la cognoissance  
Des moyens qui pourront nous oster de malheur.

Car ainsi que les mers, & les grandes riuieres  
Qui en leur braue cours sont profondes, & fieres  
Prennent des ruisselets force, & accroissement.

En semblable façon vn vaillant Capitaine  
Oyt souuent d'un soldat vn affaire certaine,  
Vn aduis, vn conseil, vn aduertissement.





A Messieurs du conseil de l'Union, & à la  
ville de Paris.

*Vous Messieurs du conseil de la sainte UNION,  
Qui tenez en voz mains noz biens, & nostre vie,  
Reicttez loing de vous la rancueur, & l'enuie  
Le dedain, l'anarice, & toute fiction.*

*Lisez, & regardez sans nulle passion,  
Ces beaux enseignemens lesquels sans piperie,  
Sans fainte, sans abus, sans dol, sans flaterie,  
Racontent nostre mal, & nostre affliction.*

*Et tout incontinent monstrent quelle racine,  
Quel secours, quel moyen, & quelle medecine  
Nous pourra tous guarir, & voyre en peu de temps.*

*Veille Dieu que chacun ensuyue ces preceptes,  
Ces aduertissemens, ces certaines receptes,  
Car si cela se faict, nous serons tous contans.*



